


Mes piz: Péz Garvera

DA SUSI ROTHMUND/FMR

■ Sch'i n'ha betg gist ina tschajera sur la vallada, lura ves jau mintga di ch'jau sun a chasa e guard or da fanestra la Garvera. Ma er sch'i ha num il Péz Garvera (2384 m s.m.) na para quai betg propi d'esser in piz, mabain in lung fil. Ella è numnadamain lunga, la Garvera, ed i n'è betg prentensius d'ascender il punct il pli aut. Ina visita sin Garvera è ina tura ch'jau fascheva gugent cun mes buobs gia cura ch'els eran pitschens. Magari partend da Laus u da la Val Sumvitg enfin sin il Con e l'Alp Naustgel. Ina giada sin il fil ston ins dentant far atenziun trasora dals uffants, pertge sch'ins guarda sur la Garvera giadora vers Sumvitg e da la Surselva ensi ed engiu è quai tuttina in pulit precipizi.

Quai avra dentant il cor da far in paus tar la crusch e giudair la survista grondiusa sin quasi tut la chadaina da pizs en il nord da la Surselva e lunsch sin la pizza curclada da naiv en il sid.

Jau guard er gugent sin la Garvera cur ch'jau fatsch ina visita al Lag da Laus, in da mes lais preferids. Impressiuant è quai l'atun cur ch'ins po udir ils cloms dals tschiervs en chalur en l'asil. Blers van er enturn la Garvera: Partend da Curaglia



ILLUSTRAZIUN FMR

en la Val Medel maina la tura tras la Val Platta en direcziun Alp Soliva. Da là entagiur sur il fil da la Garvera ed enturn fin tar il Lag da Laus e da là sur Cavardiras enavos a Mustér. Quai è in viadi pulit lung da 21 km ed ins sto quintar cun passa set uras tar in'ascensiu da 1206 m.



Cifras e fatgs

Num:	Péz Garvera
Autezza:	2384 m s.m.
Ascensiu:	differentas pussaivladads

En ina seria cun il titel «Mes piz» preschenta la redacziun da la FMR mintgadi in piz ord vista persunala, differentes pizs tranter Müstair e Tschamut. Quella pizza vali la paina da scuvrir u silmain observar durant questa stad da «distanza».